

欽定天文正義

欽定天文正義卷十八

辰星占

辰星占

史記天官書察日辰之會以治辰星之位曰北方水太陰之精主冬日壬癸刑失者罰出辰星以其宿命國是正時四仲春春分夕出郊奎婁胃東五舍為齊仲夏夏至夕出郊東井輿鬼柳東七舍為楚仲秋秋分夕出郊角亢氐房東四舍為漢仲冬冬至晨出郊東方興尾箕斗牽牛俱西為中國其出入常以辰戌丑未其蚤為月蝕晚為孛星及天矢其時宜效不效為失正義收見也追兵在外不戰一時不出其時不和四時不出天下大飢其當效而出也色白為旱黃為五穀熟赤為兵黑為水出東方大而白有兵于外解常在東方其赤中

國勝其西而赤外國利無兵于外赤兵起其與太白俱出東方皆赤而角外國大敗中國勝其與太白俱出西方皆赤而角外國利五星分天之中積於東方中國利積于西方外國用者利五星皆從辰星而聚于一舍其所舍之國可以法致天下辰星不出太白為客其出太白為主出而與太白不相從野雖有軍不戰出東方太白出西方若出西方太白出東方為格野雖有兵不戰失其時而出為當寒反溫當溫反寒當出而不出是謂擊卒兵大起其入太白中而上出破軍殺將客軍勝下出客亡地辰星來抵太白太白不出將死正旗上出破軍殺將客勝下出客亡地視旗所指以命

破軍其統環太白若與關大戰客勝免過太白間可滅劍

集解滅音  
凶客也

小戰客勝免居太白前軍罷出太白左小戰摩

太白有數萬人戰主人吏死出太白右去三尺軍急約戰青

角兵憂黑角水赤行窮兵之所終免亡命曰小正辰星天

機安周星細爽能星鉤星其黃而小出而易處天下之

文變而不善矣免五色青圓處白圓喪赤圓中不平黑

圓吉赤角犯我城黃角地之爭白角號泣之聲其出東

方行四舍四十八日其數二十日而反入于東方其出西方

行四舍四十八日其數二十日而反入于西方其一候之管

室角畢箕柳出房心間地動辰星之色春青黃夏赤白

秋青白而歲熟冬黃而不明即變其色其時不昌春不見大風秋則不寒夏不見有六十日之旱月蝕秋不見有兵春則不生冬不見陰雨六十日有流邑夏則不長七星為員官辰星廟蠻夷星也

晉書天文志辰星曰北方冬水智也聰也智虧聰失逆冬令傷水氣罰見辰星辰星見主刑主廷尉主燕趙又為燕趙代以北宰相之象亦為殺伐之氣戰鬪之象又曰軍於野辰星為偏將之象無軍為刑事和陰陽應效不效其時不和出失其時寒暑失其節邦當大飢亦曰辰星出入躁疾常主夷狄又曰蠻夷之星也亦刑罰之得失色黃

而小地大動

宋史天文志星經曰辰星主常山冀并幽州又主斗牛女  
虛危室壁又曰主燕趙代主廷尉以比宰相之象石申曰色  
黃五穀熟黑為水蒼白為喪

觀象玩占辰星一曰安調一曰細極一曰熊星曰鉤星曰司  
農曰兌星曰小武曰伺晨曰鼎星曰小爽北方黑帝叶光紀  
之使元武之宿水之精也其曰壬癸其辰亥子其帝顓頊其  
神元冥其音羽其穀六其卦坎主刑獄陰阻之事辰星所在  
有權智用兵為主辰星出入必以陰雨不則陰風

按水星小輪以日為心每日平行一度弱歲一周天星循

小輪周每日平行三度十分度之一強自合伏後夕見西方  
順行率四十日而留退退行十二日而復又十二日晨見  
東方退行退而復順順行四十六日復與日合凡百十  
六日而復始凡此皆據平行度而言加以星行有盈縮黃  
道有斜正緯度有南北其伏見順逆之節又微有不同  
天官書出四十八日入二十日其數近是但云四十八  
日者乃自合伏而言非自出時而言也其差距日前後多  
者不過二十七度五緯惟水星體小距近而行速故見不  
久而即伏一歲率三伏三見凡五百八十四日與金星同  
出其出也夕見西方必在日東三舍晨見東方必在日西



三舍其曰春分夕出奎婁東五舍云云者乃約舉四時列舍為言太陽四時各行七舍孟月晨出必在七宿前季月夕出必在七宿後非必四仲月而後出也天文家以辰星出四孟四季為占非知歷者至於失時而出當效不效則推算之誤五星皆然辨見前卷

### 辰星行色變異占

開元占荊州占曰辰星色比織女大星為正色青比左角赤比參右肩黑比亢比晨星之常色也又曰辰星經天凶又曰辰星出穰氣一丈大水

觀象玩占甘氏曰辰星在冬曰王色比奎大星青白精明而

有光仲冬之月有芒角在秋曰狷其色精明無芒角不搖在  
春曰休其色青黃微小無精光在夏曰囚其色黃黑小而不  
明在四季曰死其色青赤小而不明其常也不失其常則天  
下和平當王時而有相色大臣專政君令不行有休色冬旱  
不冰有囚色冬無霜有死色冬雨霧日不明雷電行其留守  
之舍國不祥其進舍也與五星合天下有謀其退舍也五行  
星及之不可舉事用兵當相時而有王色主弱臣強有休色  
政令不行有囚色秋不霜有死色穀不成雷不藏其留守之  
舍其國破亡其進舍也與五星合其國有殃其退舍也五星  
及之不可舉事用兵當休時而有王色人主政弊大臣從橫

有相色將相君臣不和有囚色夏旱有死色六月疫作有土功其留守之舍其國多死小兒其進舍也與五星合天下有水其退舍也五星及之其國不可舉事用兵當囚時而有王色夏雨雪霜雷電不行有相色秋有暴兵有囚色流水湯湯有死色暴徵興大臣殃其留守之舍五穀不生其進舍也與五星合有德令其退舍也五星及之不可舉事用兵當死時而有王色貴人疾病有相色臣疾病有休色民疾病有囚色大旱其留守之舍有疫其進舍也與五星合其年穀不登其退也國有兵不成行辰星正色春當青黑夏當赤黑四季黃黑秋白冬黑則吉其變色也青為憂刑獄

起生殺不當蝗蟲為災民多疥胎有妖色赤而昧刑禍並起  
其國旱又多暴風冬不雪而有雷色白而大威刑並作獄訟  
繁多霜雪不時大臣戮兵起色黑大水色黃而小地動辰  
星黑而圓而明潤吉黑角憂水有小戰甘氏曰辰星色黑  
三芒天下有兵兵止無兵兵起有水災黃潤有福辰星怒芒  
角有暴獄不則水損城郭傷禾苗辰星晝見其國亂一  
曰刑獄繁兵大起辰星出彗天下大水鄰萌曰不出三月  
兵聚其下辰星出氣長一丈大雨水辰星出氣為黑穰其夕  
不大雨則明日大霧不出六十日其所在之野大水牛馬羊  
皆貴辰星自暈巫咸曰邊有兵一曰有水兵為患三年乃止

辰星守烈宿色黃小則為敗常以冬至癸日候之變色則  
則為災

### 月犯辰星

晉書天文志辰星光明與月相遠其國大水

觀象玩占月犯辰星兵起上卿死或曰廷尉憂之月與水  
薄京房曰天下大水月蝕辰星其國有女憂有水飢一  
曰所當之國戰不勝月與辰星會合其宿國雨水敗物一  
曰兵起其國亡地又曰其分人流亡辰星入月中臣叛主荆  
州占曰有水有刑事起一曰其下大戰亡國不利先舉者又  
曰內謀起冬大雪又曰辰星入月人主戰敗亡地一曰牛馬

疫粟貴

辰星歲星相犯

開元占歲星與辰星合先起兵者凶後起兵者吉辰星與歲星合其分有水兵飢並起

觀象玩占辰星犯歲星其國外野不安守歲星天非時降霜

辰星熒惑相犯

開元占澆星與熒惑會冬為刑他時為淬其下之國不可舉事用兵必受其殃荊州占曰辰星與熒惑合而相守國有兵喪若不有兵疾疫流行又曰澆星與熒惑合其國大旱赤地千里又為飢將行舉事大敗有覆軍殺將又曰熒惑博辰

星抵之貫之穀偏將

觀象玩占辰星犯熒惑上妨太子下妨大尉司馬辰星觸熒惑太子不安若離而復合大水漂山

辰星填星相犯

宋史天文志填星犯辰星兵敗

觀象玩占辰星犯填星甘氏曰夏寒妨女主荊州占曰春雨<sub>多</sub>守填星霜雹<sub>夏</sub>秋多雨

辰星太白相犯

宋史天文志辰星太白相犯兵敗

開元占石氏曰辰星來抵太白不去將死荊州占曰辰星與

太白相去二尺若一尺破軍殺將辰星與太白相薄戰其先起兵凶

觀象玩占辰星犯太白兵起有戰破軍殺將辰星在上客勝在下客負守太白為變謀為兵憂守之旬日不去主將人兵不利將死

辰星雜干犯占

宋史天文志辰星與他星光耀相逮為害客星流星相犯主內患

觀象玩占辰星與客星合天下亂辰星與客星鬪大國宮中有事石氏曰天下亂兵起客星入辰星巫咸曰天下大



永大理御史官死。荊州占曰：刑獄事大興。流星犯辰星。天子令行。曰：大水至。水官憂。流星入辰星。天下大水。御史獄官多死。流星犯辰星。辰星失光。外邦有使至。論得失。欲行直言。

欽定天文正義卷十九

紫微垣占

紫微垣占

史記天官書中宮天極星環之匡衛十二星藩臣皆曰紫宮

晉書天文志紫宮垣十五星其西藩七東藩八在北斗北一曰紫微大帝之坐也天子之常居也主命主度也一曰長垣一曰天營一曰旗星爲蕃衛備蕃臣也宮闕兵起按宋史作旌旗星門開兵起直天子出自將宮中兵

宋史天文志紫微垣東藩八星西藩七星東藩近闔闔門第一星爲左樞第二星爲上宰三星曰少宰四星曰上弼五星曰少弼六星爲上衛七星爲少衛八星爲少丞其西藩近闔闔門第一星爲右樞第二星爲少尉第三星爲上輔第四星爲少輔第

五星爲上衛第六星爲少衛第七星爲上丞其占欲均明大小有常則內輔盛垣直天子自將出征門開兵起宮垣兩藩正南開如門曰閭闔

按紫宮兩藩史記作十二星晉隋天文志丹元子步天歌皆作十五星而通志釋步天歌又引張衡之說亦作十五星則是漢時已作十五星矣今測同

觀象玩占紫微宮垣十五星東西列以衛北極爲藩屏之臣在北斗之北太乙之常居土官也又曰紫微宮垣在北極三十六度之內日月五星所不至若有入其中者皆爲失行當有易姓改王亂兵並作之應占書不具載者以爲非常之變也

按月五星凌犯必係近黃道之星在黃道南北十度以內。今云北極三十六度之內。乃據中州北極出地。恒星常見不隱之界而言。月五星循黃道右旋。月距黃道不過六度。土星距黃道不過三度。木星距黃道不過二度。火星距黃道不過五度。金星距黃道不過十度。水星距黃道不過四度。故黃道南北十度以外。皆月五星所不及凌犯者也。至於五星失行。古雖有其說。推步家不取。則其所謂占亦不足據矣。

### 彗孛客星見紫微

漢書天文志。客星在紫宮中斗樞極間。占曰爲兵。後漢書天文志。彗所以除穢。紫宮天子之宮。彗加其藩。除宮之象也。 閣道

紫宮天子之宮也客星犯入留久爲大喪

晉書天文志星孛於紫宮占曰外臣陵主 客星在紫宮占曰

爲兵喪

宋史天文志客星守有不臣國易政國皇星兵

彗星犯有異王立

開元占感精符曰星孛於紫宮將有陰謀反者陳卓曰有大變  
觀象玩占彗孛入掃紫宮若出之皆爲除舊布新有德者昌無  
德者亡 客星入紫微宮中宮中有大變兵起主憂赤星入垣  
中天下亂兵入天子之都列大夫多死者入其傍多亂臣赤黑  
星入垣從陽入有客兵期六十日從陰入有走王黃星入垣天

子得地有喜客星犯垣有喪以所中命之

天文會通彗星出紫微垣犯東西蕃星有內變亦曰有陰謀逆  
上彗星光芒及尋丈直抵紫微垣有自立諸侯亦曰諸侯擅天  
子柄彗星抵紫宮芒角自西蕃出東蕃禁衛有變客星正圓  
如拳及如獸狀出紫微垣天子用璧玉賜諸侯玉客星犯東西  
左右驂樞人臣擅兵柄犯上少宰當易宰相期一年犯東西少  
輔則權臣被黜亦曰宰相有憂犯東西上少衛則禁兵有急犯  
東西上少丞則羣臣有憂客星入紫宮色黃潤王者有喜慶事  
亦曰邊陲益地色青白而怒角有叛臣在君側色黑赤而芒角  
輔臣有憂

流星出入紫微

宋史天文志流星自閭闔門出四野者當有中使銜命視其所往分野論之不依門出入者外蕃國使也犯之爲兵喪水旱不調使星入北方兵起

觀象玩占流星入紫微宮使者來復命色青黑使者有憂一曰諸侯有使來以所起言其國以色言其吉凶荊州占曰流星自兩門出者天子使也其入則爲使入不從門出入者內則后妃諸王外則藩國使也出則使出入則使入隨色占之

天文會通流星出紫宮天子之使也色青言憂色赤言兵色黃土功色白言義色黑言水事皆以所往之國命其野



雲氣出入紫微

後漢書天文志白氣生紫宮中爲喪

觀象玩占雲氣如鷄雛出紫宮中此子孫之氣也天子有子孫之喜黃白氣潤澤狀如刀劍入紫微宮中御女星上天子有男子之喜狀如帚生女子黃白氣正圓如盃椀入紫宮中有立侯王一曰天子得璧玉喜黃白氣如旗有光起紫宮上天子有大喜延年益壽黃白氣狀類走獸飛鳥或如龍如鳳出入紫宮天子有喜黃白氣如獸出紫宮天子以畜賜諸侯王若自外入之則有貢奇獸者赤黃氣出紫微宮有立王赤黃氣出紫宮東西藩天子有賜侯王一曰兵起赤黃氣潤澤入紫宮天子得寶劍

赤黃氣如帚出紫宮中天子有賜後宮赤氣出紫宮中兵起赤氣入紫宮或指之外兵入蒼白氣入紫宮中宮中有憂出之禍除蒼白氣如走獸入紫宮有反者赤黑氣若蒼白黃赤雜氣狀如蛇如蛟龍在紫微庭中宮闕上者有白衣之會若徘徊周章環繞紫宮而入之此姦臣亂賊之氣也白氣入紫微宮有喪黑氣入紫微宮宮中有疾病入兩藩兵起

## 北極

史記天官書中宮天極星其一明者太乙常居也索隱北極謂之北辰又春秋合誠圖云北極其星五在紫微中宋史天文志北極五星在紫微宮中北辰最尊者也其紐星爲

天樞天運無窮三光迭耀而極星不移故曰居其所而衆星共之第一星主月太子也二星主日帝王也亦太一之坐謂最赤明者也第三星主五行庶子也北極中星不明主不用事右星不明太子憂左星不明庶子憂明大動搖主好出游色青微者

凶

觀象玩占北極五星一曰天極一曰北辰天之最尊星也其第一星主月太子也第二星主日帝王也第三星主五行庶子也第四星后宮也第五星天極也張衡二星並爲后宮天子有道則北極齊明不明則人君耗

按北極五星其最南一星亦在黃道北六十七度強月五星

皆不及犯

彗孛客星見北極

宋史天文志客星入爲兵喪

觀象玩占彗孛出北辰臣謀君天下亂有立王犯北辰若指之天下兵起有大喪客星出北極旁石氏曰帝王暴驚宗室亂宜修郊祀奉宗廟行德令以禳之客星入北極天下道塞入天樞人主有非常之變客星守天極天下憂國易政若犯太子則太子憂犯庶子則庶子憂后宮亦然赤星出北極天下兵車盈野郝萌曰星所之國大敗

天文會通彗星本近北辰芒角怒炸垣外長可尋夫主有內變

星孛北辰紐星國有兵喪

流星出入北極

宋史天文志流星入兵起地動

觀象玩占流星出北極天子使出入之使入黃帝占曰地動石氏曰兵在外者罷又曰常以戌日視北辰有流星出之則天子有德令

雲氣出入北極

觀象玩占蒼白雲氣入天樞中天子憂疾出之則禍除黃白氣入天樞中外方入貢出則天子有賜於諸候黑氣入天樞天子憂赤氣入天樞天下兵起出天樞宮中有兵

天文會通蒼白氣入天樞中兵起青雲氣入紫宮繞天樞上盤  
覆不散者天子憂國用黑氣掩北極五穀不登水傷禾稼亦曰  
有急兵

## 北斗

史記天官書北斗七星所謂璇璣玉衡以齊七政杓攜龍角衡  
殷南斗魁枕參首用昏建者杓杓自華以西南夜半建者衡衡  
殷中州河濟之間平旦建者魁魁海岱以東北也斗爲帝車運  
於中央臨制四鄉分陰陽建四時均五行移節度定諸紀皆繫  
於斗 輔星明近輔臣親彊斥小疏弱

晉書天文志北斗七星在太微北七政之樞機陰陽之元本也

故運乎天中而臨制四方以達四時而均五行也。魁四星爲璇  
璣杓三星爲玉衡。又曰斗爲人君之象。號令之主也。又爲帝車。  
取乎運動之義也。又魁第一星曰天樞。二曰璇。三曰璣。四曰權。  
五曰玉衡。六曰開陽。七曰搖光。一至四爲魁。五至七爲杓。樞爲  
天璇爲地璣爲人權爲時。玉衡爲音。開陽爲律。搖光爲星。石氏  
玉第一曰正星。主陽德。天子之象也。二曰法星。主陰刑。女主之  
位也。三曰令星。主中禍。四曰伐星。主天理。伐無道。五曰殺星。主  
中央。助四旁。殺有罪。六曰危星。主天倉。五穀。七曰部星。亦曰應  
星。主兵。八主天。二主地。三主火。四主水。五主土。六主木。七主  
金。又曰一主秦。二主楚。三主梁。四主吳。五主燕。六主趙。七主齊。

輔星傳乎開陽所以佐斗成功丞相之象也七政星明其國昌  
輔星明則臣強

宋史天文志魁第一星曰天樞正星主天又曰樞爲天主陽德  
天子象其分爲秦漢志主徐州天象占曰天子不恭宗廟不敬  
鬼神則不明變色二曰璇法星主地又曰璇爲地主陰刑女主  
象其分爲楚漢志主益州天象占曰若廣營宮室妄鑿山陵則  
不明變色三曰璣爲人主火爲令星主中禍其分爲梁漢志主  
冀州若王者不恤民驟征役則不明變色四曰權爲時主水爲  
伐星主天理伐無道其分爲吳漢志主荊州若號令不順四時  
則不明變色五曰玉衡爲音主土爲殺星主中央助四方殺有



罪其分爲燕漢志主兗州若廢正樂務淫聲則不明變色六曰  
開陽爲律主木爲危星主天倉五穀其分爲趙漢志主揚州若  
不勸農桑峻刑法退賢能則不明變色七曰搖光爲星主金爲  
部星爲應星主兵其分爲齊漢志主豫州王者聚金寶不修德  
則不明變色又曰一至四爲魁魁爲璇璣五至七爲杓杓爲玉  
衡是爲七政星明其國昌第八曰弼星在第七星右不見漢志  
主幽州第九曰輔星在第六星左常見漢志主并州晉志輔星  
傳乎開陽所以佐斗成功丞相之象也其色在春青黃在夏赤  
黃秋爲白黃冬爲黑黃變常則國有兵殃明則臣強斗旁欲多  
星則安斗中星少則人恐

觀象玩占石氏曰北斗第一星曰正星二曰法星三曰令星四曰伐星五曰殺星六曰危星七曰部星亦曰應星北斗正星色赤有兵色白爲水色青春至夏馬牛金石物貴夏至秋黍麥貴秋至冬粟麥魚鹽貴冬至春薪菜貴而糴賤法星色赤有兵色青君有暴疾色青白有白衣會色黃黑更幣色黑有大水色黑而白角環之有暴風水令星色青黑更法令天下不寧青黃有兵伐星色青若赤大臣有憂色黃人主有喜殺星色青米粟貴色赤菽貴色赤黑麥貴色白禾黍貴色黑糴賤危星色青有離國色赤有兵應星色赤有兵色青有徙民色黃君益地色白有憂色黑有水春色赤則有喜 輔一星主輔正匡危矯不平丞

相之象也其星欬小而明明近則輔臣親疏則輔臣非其人大而明則臣奪君政小而不明則臣不任職斗明而輔不明主強臣弱輔明而斗不明則臣強主弱輔星明與斗齊則國兵暴起輔亡不賊相死若近臣合黨排賢用佞則輔生角臣擅國權欲謀社稷則輔生翼一曰輔星生翼大將謀天子驚輔星生角江河潰決

按北斗七星輔一星其最南一星亦在黃道北四十五度強月五星皆不及犯

琴字星見北斗

晉書天文志有星孛於北斗占曰彊國發兵諸侯爭權

宋史天文志星孛於北斗主危 客星犯爲兵

觀象玩占彗孛入北斗諸侯結謀一曰天下起兵相伐彗孛出北斗國易政兵起大戰先起者亡中起者殃後起者昌一曰臣謀叛宮中火起都萌曰彗出北斗長八九丈名曰勉功出則天下更政 客星入北斗魁中都萌曰貴人有繫獄者一曰人主左右有囚者色黃白釋免青憂黑死赤誅死一曰大臣諸侯憂客星出北斗魁中天子自將兵甘氏曰有死君色赤楚當之色青齊當之色黃衛當之色白秦當之色黑燕當之都萌曰有赦星大有大赦小則小赦客星出北斗正星爲政者易出法星主當之出令星執法者逐於諸侯出伐星天子與蠻夷和親出殺

星大臣走出危星令不行石氏曰客星出北斗中如赤烏黑頭  
天下起兵客星出北斗旗間兵大起貴臣誅人主憂旗者紫宮  
北斗兩間也客星來居北斗魁下色青黑中國有兵有大客客  
星守北斗大水道不通客星抵正星有客抵伐星人多死有光  
女主疾有光環伐星君疾客星入輔星有善令若犯或守之  
色青相以罪免色赤相受兵若將兵黃白相有喜黑相死若黜  
流星出入北斗

宋史天文志流星犯主客兵

觀象玩占流星入北斗魁中大發兵將軍出期一年或曰大臣  
有係獄者以五色占吉凶一曰流星入北斗外國有使以金玉

來貢大流星入北斗魁中大臣有叛者彗星入北斗中國遣使  
之匈奴流星入北斗應星中天下有赦流星出北斗人主使人  
於諸侯色黃白有賀事青黑有憂事赤兵事期二年流星出北  
斗魁中兵起將出亦曰有赦一曰色赤其年兵起色黃則有赦  
流星出北斗東行齊魯鄭負兵南行吳楚負兵西行秦晉負兵  
北行燕趙負兵不出三年

### 雲氣出入北斗

觀象玩占雲氣五采入北斗立太子青雲氣奄斗明日雨青雲  
氣加北斗法星有大水狀如刀劒馬牛大損青雲氣在伐星下  
有兵國有憂期五月青雲氣長竟天其末有星加伐星天下有

大水有大獄青雲壓北斗大雨即至赤雲氣覆斗上兵起氣多  
兵大氣小兵小赤氣入北斗大旱兵起防火災赤氣入北斗魁  
中將相有受戮者亦爲兵起赤雲若霧奄北斗大熱黃氣出北  
斗魁中天子出德令黃雲霧蔽北斗明日雨白雲氣壓北斗不  
過三日有雨白氣濛濛然有光自地起接連北斗大風即至黑  
雲氣集北斗旁大如席狀如禽獸不出三日必雨黑氣入北斗  
如烏鳥如龍蛇變化爲疾病人死亡不宜乳婦黃白氣入北斗  
有使從外來出北斗天子遣使於諸侯黃白氣橫北斗上下或  
出入北斗皆爲國有喜蒼白氣入北斗多大風天無雲而北斗  
上下獨有雲五日內大雨黃白雲氣集輔星相有喜赤氣入

輔星相受斧鉞之誅蒼白氣入輔星相有憂白氣入輔星相點  
黑氣入輔星相死

勾陳

史記天官書後句四星

按後指上文北極而言

末大星正妃餘三星後宮

之屬也索隱援神契云辰極橫后妃四星從大妃光明又按星  
經以後句四星名爲四輔其勾陳六星爲六宮亦主六軍與此  
不同也

宋史天文志勾陳六星在紫宮中五帝之後宮也太帝之正妃  
也大帝之帝居也樂緯曰主後宮巫咸曰主天子護軍荊州占  
主大司馬或曰主六軍將軍或曰主三公三師爲萬物之母六



星比陳象六宮之化其端大星曰元妃餘星乘之曰庶妾在北極配六輔其占色不欲甚明明即女主惡之星盛則輔強主不用諫佞人在側則不見

按勾陳六星其最南一星亦在黃道北六十五度強月五星皆不及犯

### 彗孛客星見勾陳

宋史天文志客星入勾陳色蒼白將有憂白爲立將赤黑將死客星出而色赤戰有功守之後宮有女使欲謀 彗星犯之后宮有謀近臣憂

觀象玩占彗孛入勾陳幸臣亂宮中有誅者一曰臣爲逆 客

星守勾陳兵起軍破將軍有凶赤星出勾陳兵起大戰將有功  
赤星入勾陳有劫主者若犯之宮中有變一日兵亂司馬死黃  
星出勾陳兵在外者罷入之天子命大司馬黑星入勾陳大司  
馬溺水死蒼白星入勾陳大司馬死

天文會通彗孛犯守勾陳主兵動將軍戮 客星黃色出勾陳  
旁後宮有喜

流星出入勾陳

宋史天文志流星入爲迫主

觀象玩占流星出勾陳後宮有憂乙巳占流星衝入勾陳使還  
見天子以色占其吉凶

雲氣出入勾陳

宋史天文志青氣入大將憂

觀象玩占雲氣蒼白入勾陳中大司馬憂死出勾陳將憂軍破  
赤雲氣出勾陳中兵起大戰將有功赤雲氣入勾陳內亂大司  
馬殘死白氣入天子立宗廟黃白氣入天子立大司馬兵在外  
不戰黃白氣出兵告罷黑氣入大司馬軍中死事出則禍除青  
氣入大司馬憂黃氣光潤入之天子立后

天皇大帝

宋史天文志天皇大帝一星在勾陳口中其神曰耀魄寶主御

羣靈軌

按晉書作執

萬神圖大人之象也

觀象玩占。天皇大帝一星常隱隱不明。明則爲災。若光動有芒。則失常。人君行不中度。

按天皇大帝一星在黃道北六十八度。月五星皆不及犯。

彗孛客星見天皇大帝

宋史天文志。客星犯之爲除舊布新。彗孛犯大臣叛。

流星出入天皇大帝

宋史天文志。流星犯國有憂。

觀象玩占。流星出大帝坐。天子使出。

雲氣出入天皇大帝

宋史天文志。雲氣入之潤澤吉。

天文會通雲氣入紫宮犯掩帝座潤澤吉黃白氣入紫宮連大帝座臣有獻貢黃氣在大帝側不散天子有喜慶事亦曰邊陲益地蒼白氣若匹練竟天掩天皇座者天下有憂

#### 四輔

宋史天文志四輔四星又名四弼在極星側是曰帝之四鄰所以輔佐北斗而出度授政也武密曰光淨而動凶明小吉暗則不理

觀象玩占張衡曰四輔爲輔臣之位主贊萬機星小而明則吉明大芒角則臣逼君暗則輔臣失職政事不理星亡則君臣失禮輔臣有誅死者

按四輔四星其最南一星亦在黃道北六十三度弱月五星皆不及犯

彗孛客星見四輔

宋史天文志客星犯之大臣憂彗孛犯權臣死  
觀象玩占彗孛犯四輔輔臣有戮者石氏曰有彗一日兵喪  
客星犯四輔人主憂宰相死一日三公大臣有殃巫咸曰近臣  
死

天文會通彗孛干犯四輔貴相當之

流星出入四輔

宋史天文志流星犯大臣黜

觀象玩占流星出四輔宰相出使流星橫貫四輔外國使來  
天文會通流星抵四輔大臣出鎮

### 雲氣出入四輔

宋史天文志黃白氣入四輔有喜白氣入相失位

觀象玩占黃白雲氣潤澤入四輔輔臣有喜赤氣入之輔相者  
憂兵白氣入相失位或疾病

天文會通黃氣繚繞四輔而不掩久而不散者宰相進秩青赤  
氣如戟狀入四輔中則輔弼之臣爭權黑氣貫四輔則輔臣死

### 五帝內座

宋史天文志五帝內座五星在華蓋下設叙順帝所居也色正

吉變色爲災

觀象玩占五帝內座五星斧辰之象所以備宸居者其星明正則吉變動則宸居不安

按五帝內座五星其最南一星亦在黃道北五十六度月五星皆不及犯

彗孛客星見五帝內座

宋史天文志客星犯紫宮中座占爲大臣犯主

彗孛犯之民饑大臣憂三年有兵起

流星出入五帝內座

宋史天文志流星犯爲兵起臣叛出爲有誅戮



觀象玩占流星出帝座邊兵出一曰天子有大使出一曰大將軍出一曰倖臣誅不則自殺凡流星出諸座大抵皆爲天子使出入則爲使入以色言吉凶三垣帝座其占同

天文會通流星干犯五帝座主移宮室

雲氣出入五帝內座

觀象玩占雲氣蒼白色入帝座有喪赤氣入之人主立廟又曰防姦人黑氣入帝座人主憂病黃白氣狀如盃棹正圓入紫宮帝座有獻璧者

天文會通赤黃氣出五帝座有喜蒼白氣掩蔽五帝座禁衛有兵變

# 六甲

宋史天文志六甲六星在華蓋扛旁主分陰陽配節候故在帝旁所以布政教授農時也明則陰陽和不明則寒暑易節星亡水旱不時

按六甲六星其最南一星亦在黃道北五十四度弱月五星皆不及犯

彗孛客星見六甲

宋史天文志客星犯之色赤為旱黑為水白則人多疫 彗孛犯女主出政令

觀象玩占彗孛犯六甲人君廢園史

天文角通彗孛干犯六甲政教失國易政犯守六甲太史官災  
客星守六甲色黃潤糴賤五穀豐客星干犯六甲農事廢寒暑  
相反

### 流星出入六甲

宋史天文志流星犯爲水旱術士誅

觀象玩占流星抵六甲術士憂巫咸曰流星貫六甲太史廢一  
曰水潦不節農失其時寒暑易候一曰大旱乙巳占流星犯六  
甲賢良用

### 雲氣出入六甲

宋史天文志雲氣犯色黃術士興蒼白史官受譴

觀象玩占黃白氣入太史受爵賜黑氣入太史憂  
天文會通青白氣出六甲術士有奸謀黑氣貫六甲或明或沒  
天下惑邪道

### 柱史

宋史天文志柱史一星在北極東主記過左右史之象一云在  
天柱前司上帝之言動星明爲史官得人不明反是  
天文會通柱史一星明則言路不塞上下情達暗及變色則邪  
佞在位

按柱史一星在黃道北八十五度弱月五星皆不及犯  
孛孛客星見柱史

宋史天文志客星犯之史官有點者 彗孛犯太子憂若百官

點

天文會通彗孛干犯柱史言路塞諫官受誅 客星干犯柱史  
色黃言官直色赤白有怒角諂諛在位

流星出入柱史

宋史天文志流星犯君有咎

觀象玩占流星入柱史君自示其咎一曰柱史受刑

天文會通流星干犯柱史左右史有讒言

雲氣出入柱史

宋史天文志雲氣犯色黃史有爵祿蒼白氣入左右史死

觀象玩占黃白氣入柱史左右史有邊

## 女史

宋史天文志女史一星在柱史北婦人之微者主傳漏

觀象玩占女史一星主傳漏記時漢有侍史其象也張衡曰婦官主記宮禁動靜之事星明則記得其實微暗則婦官失職

按女史一星在黃道北八十四度月五星皆不及犯

## 孛孛客星見女史

觀象玩占孛孛犯女史女史受誅大抵占同柱史客星犯女

史婦道憂

天文會通孛孛干犯女史宮中有異謀

星孛女史宮壙失序

客星干犯女史宮中有匿謀亦曰有狂巫惑衆

### 雲氣出入女史

天文會通黃雲氣入女史后妃生子黑氣入後宮失寵

### 天柱

宋史天文志天柱五星在東垣下一云在五帝左稍前

觀象玩占天柱五星在紫微宮中華蓋杠左旁近東垣北隅主建政教縣法禁又主晦朔晝夜之職星明正則陰陽和天下平不明則寒暑失節變動則司歷有殃

按天柱五星其最南一星亦在黃道北七十一度月五星皆不及犯

彗孛客星見天柱

宋史天文志客星犯之國中有賊 彗孛犯君憂一日三公當之

觀象玩占客星犯天柱大臣爲變守天柱君臣皆憂  
流星出入天柱

觀象玩占流星抵天柱石氏曰有更政三公憂衝入天柱人主  
憂大使還衝出天柱天子發大使出振威天下

雲氣出入天柱

觀象玩占雲氣赤黃入天柱天子喜有封陵廟之事出天柱三  
公錫爵天下受賜黑氣入三公災



天文會通黑氣繞天柱政令不施於下亦曰有冤獄

### 女御

宋史天文志女御四星在大帝北一云在勾陳腹一云在帝座東北御妻之象也星明多內寵

觀象玩占女御四星主禮儀侍帝宴寢

按女御四星其最南一星亦在黃道北八十度強月五星皆不及犯

### 孛孛客星見女御

宋史天文志客星犯之後宮有謀一云有戮  
孛孛後宮有誅  
觀象玩占客星守女御後宮有廢黜者

流星出入女御

宋史天文志流星犯後宮有出者一云外國進美女

觀象玩占流星犯女御後宮有黜者一曰天子以宮女賜人

雲氣出入女御

宋史天文志雲氣色黃爲後宮有子喜蒼白多病

觀象玩占赤黃氣入后妃受賜黑氣入死喪

尚書

宋史天文志尚書五星在紫微東蕃內大理東北晉志在東南  
維一云在天柱右稍前主納言風夜咨謀龍作納言之象  
觀象玩占尚書五星八座大臣之象其星小而明則吉明大芒

角則臣強逼君暗則臣失職星亡不見則輔臣誅

按尚書五星其最南一星亦在黃道北八十度月五星皆不及犯

彗孛客星見尚書

宋史天文志彗孛犯之官有叛或太子憂

觀象玩占彗孛犯尚書大臣有以家事坐罪者

客星犯尚書大臣死不則有貶黜守之八座下獄受誅者

流星出入尚書

宋史天文志流星若出則尚書出使犯之諫官黜八座憂

觀象玩占流星入尚書八座官憂黜

雲氣出入尚書

宋史天文志雲氣入黃爲喜黃而赤尚書出鎮黑尚書有坐罪者

觀象玩占黃雲氣入尚書八座官受賜赤黃氣入尚書八座官有受土地出鎮者黑氣入尚書尚書掌刑法者坐罪期百八十日

大理

宋史天文志大理二星在宮門左一云在尚書前主平刑斷獄明則刑憲平不明則獄有冤酷

觀象玩占大理二星在紫微宮內垣門之左近陰德平獄之官

也

按大理二星在黃道北六十四度月五星皆不及犯

孛孛客星見大理

宋史天文志客星犯之貴臣下獄色黃赦白受戮赤黃無罪守之則刑獄寃滯或刑官有黜孛犯獄官憂

觀象玩占孛孛犯大理大臣有以家事坐罪者

天文會通孛孛干犯大理貴人犯法孛本出大理光芒炸他星以所當星命之假令光衝尚書則輔臣受刑光滅柱史則史官繫獄

流星出入大理

觀象玩占流星出大理刑法之官出使犯大理刑獄官憂抵大理決獄不平刑獄之官黜入大理貴人下獄

天文會通流星抵觸大理星不見刑獄濫執法者非其人

### 雲氣出入大理

宋史天文志雲氣入黃白爲赦黑法官黜

觀象玩占黃雲氣入大理刑法官有遷

天文會通赤氣入大理刑罰不中蒼白氣出之法官有憂

### 陰德

史記天官書前列直斗口三星

按前承上文指紫宮而言

隋北端允若見若

不曰陰德或曰天一

宋史天文志陰德二星巫咸圖有之在尚書西甘氏云陰德外坐在尚書右陽德外坐在陰德右太陰太陽入垣翊衛也天官書則以前列直斗口三星隋北端兌若見若不見曰陰德謂施德不欲人知也主周急振撫明則立太子或女主治天下

觀象玩占陰德二星或曰二星一曰陰德一曰陽德

按陰德二星其最南一星亦在黃道北五十七度強月五星皆不及犯

彗孛客星見陰德

宋史天文客星犯之爲旱饑守之發粟振給彗孛犯後宮有

逆謀

觀象玩占。彗孛犯陰德。太子有謀。

天文會通。彗孛干犯陰德。太子干政。客星干犯陰德。五穀不

登。

流星出入陰德。

宋史天文志。流星犯君令不行。

觀象玩占。流星入陰德。輔臣領錢穀者黜。

天文會通。流星出陰德。國用乏。

雲氣出入陰德。

宋史天文志。雲氣入黃爲喜。青黑爲憂。

觀象玩占。黃白氣入陰德。諸侯受賜。青白氣黑氣出入陰德。太



子憂

天文會通黃氣入陰德國用富

天牀

宋史天文志天牀六星在紫微垣南門外主寢舍解息燕休一曰在二樞之間備幸之所也

觀象玩占天牀六星在紫宮閭闔門外其星明大平正則吉傾側則人主不安暗則人主憂

天文會通天牀六星黃潤喜芒角天子有憂暗則宮庭有火災按天牀六星其最南一星亦在黃道北六十九度強月五星皆不及犯

彗孛客星見天牀

宋史天文志客星入宮中有刺客或內侍憂彗孛犯之主憂大臣失位

觀象玩占彗孛犯天牀巫咸曰御寢火災天子防刺客

天文會通星孛天牀奸邪在禁庭客星守天牀有叛謀

流星出入天牀

觀象玩占流星抵天牀天子易內寢

天文會通流星干犯入天牀宮中不安

雲氣出入天牀

宋史天文志雲氣入色黃天子得美女後宮喜有子蒼白主不

安青黑憂白凶

觀象玩占黃氣入天牀君有疾一曰后宮有子喜蒼白氣入天牀君寢疾出之疾愈青黑氣入天牀人主憂且疾

華蓋 杠

宋史天文志華蓋七星杠九星如蓋有柄下垂以覆大帝之座也在紫微宮臨勾陳之上正吉傾則凶

按華蓋七星其最南一星亦在黃道北五十一度半月五星皆不及犯杠九星其最南一星亦在黃道北四十九度半月五星皆不及犯

孛字客星見華蓋

宋史天文志客星犯之王室有憂兵起 彗孛犯兵起國易政  
觀象玩占客星守之執法臣有黜者

天文會通彗孛干犯華蓋宮中有火災

流星出入華蓋

宋史天文志流星犯兵起宮內以赦解之貫華蓋三公災  
觀象玩占流星出華蓋內使發不過三日乙巳占流星犯華蓋  
還使有功慶

天文會通流星貫華蓋光芒掩星不見有叛臣在宮中

雲氣出入華蓋

宋史天文志雲氣入黃白主喜赤黃侯王喜

觀象玩占赤黃氣出華蓋天子方鎮官皆有賜白氣入華蓋有喪赤氣入華蓋防姦客

天文會通黑氣入華蓋天子有憂

傳舍

宋史天文志傳舍九星在華蓋上近河賓客之館主北使入中國

觀象玩占傳舍九星主備姦使水官也

按傳舍九星其最南一星亦在黃道北三十五度強月五星皆不及犯

彗孛客星見傳舍

宋史天文志客星犯邦有憂一曰客星守之備姦使亦曰北地兵起 彗孛犯守之亦爲北兵

觀象玩占客星守傳舍大使轉粟自河之東有劔戟之憂

雲氣出入傳舍

宋史天文志黑雲氣入北兵侵中國

八穀

宋史天文志八穀八星在華蓋西五車北一曰在諸王西武密曰主候歲豐儉一豆二黍三大麥四小麥五大豆六小豆七粟八麻甘氏曰八穀在宮北門之右司親耕司候歲司尚食星明吉一星亡一穀不登八星不見大饑

觀象玩占八穀八星明則八穀成暗則八穀不成一星不具一穀不登三星不具民食不足八星皆亡大饑

按八穀八星其最南一星亦在黃道北二十九度半月五星皆不及犯

### 孛星客星見八穀

宋史天文志客星入穀貴孛星入爲水

觀象玩占客星犯八穀兵以饑起

天文會通星孛八穀國用匱乏盜賊掠民財

### 流星出入八穀

天文會通流星抵觸八穀若光芒有聲如雷天廩有火災

雲氣出入八穀

宋史天文志黑雲氣犯之八穀不收

內階

宋史天文志內階六星在文昌東北天皇之階也一曰上帝幸文館之內階也明吉傾動憂

觀象玩占內階六星在紫微垣外主明堂

按內階六星其最南一星亦在黃道北三十八度半月五星皆不及犯

孛孛客星見內階

觀象玩占客星守內階有姦臣在君側



天文會通彗孛犯內階防內變 客星犯之外夷遣使入朝  
流星出入內階

觀象玩占流星犯之使者至一日有陰謀事

雲氣出入內階

天文會通黃氣入內階百官有喜黑氣入之朝臣有憂

文昌

史記天官書斗魁戴匡六星曰文昌宮一曰上將二曰次將三  
曰貴相四曰司命五曰司中六曰司祿

宋史天文志文昌六星在北斗魁前紫微垣西天之六府也主  
集計天道一曰上將大將軍建威武二曰次將尚書正左右三

曰貴相太常理文緒四曰司祿

按觀象玩司中司祿

賞功進五

曰司命司怪太史主減咎六曰司寇

按觀象玩司寇司祿

大理佐理實所

謂一者起北斗魁前近內階者也明潤色黃大小齊天端臻四

海安青黑微細則多所殘害動搖三公黜

觀象玩占文昌六星如筐形主集計禍福明天道經緯天下黃

帝占曰文昌宮者天府之離宮也不明則道術隱藏其色黃潤

光明則萬民安青黑細微則天下多憂

按文昌六星其最南一星亦在黃道北三十三度半月五星

皆不及犯

琴堂容星見文昌

宋史天文志客星守大臣叛 彗孛犯大亂

觀象玩占彗孛犯文昌輔臣災一曰三公下獄有急兵易政出  
文昌天下亂大臣受殃國易政 客星犯文昌石氏曰輔臣有  
殃一曰有兵

天文會通星孛文昌大臣犯主又曰文士災

流星出入文昌

觀象玩占流星入文昌宮邊臣入朝出文昌宮三公出鎮一曰  
貴臣出師又曰貴臣將相有下獄貶出者

雲氣出入文昌

觀象玩占黃白雲氣入文昌三公受賜一曰文章之士進用赤

黃氣入將相有黠者蒼白氣入將相有憂黑氣入三公死或廢  
黠赤氣入術士有謀反舉兵者黑氣入司命司中司祿天下嬰  
兒多死

### 三公

宋史天文志三公三星在北斗杓南及魁第一星西一云在斗

柄東

按步天歌及今測三公在斗柄東

爲太尉司徒司空之象在魁西者名三

師占與三公同皆主宣德化調七政和陰陽之官也移徙不吉  
居常則安

按三公三星其最南一星亦在黃道北五十一度弱月五星  
皆不及犯

彗孛客星見三公

宋史天文志客星犯三公憂彗孛犯之三公死

天文會通彗孛出三公將相下獄客星守三公奸臣害宰相  
流星出入三公

天文會通流星抵觸三公大臣被黜

雲氣出入三公

天文會通黃氣干犯三公三公受賞赤氣入之三公有出鎮者  
黑氣入臣下有匿謀不成

三師

天文會通三師三星三公之位主理七政宣德化和陰陽星明

大有芒角則大目侵主柄星微小色黃潤則吉

按三師三星其最南一星亦在黃道北四十七度半月五星皆不及犯

彗孛客星見三師

天文會通彗孛犯三師大臣憂 客星犯三師三公失職

流星出入三師

天文會通流星入抵三師宰相出使

雲氣出入三師

天文會通黃白氣入三師相憂黑氣入三師臣下爭權黃氣繚繞三師久而不散宰相進秩

天牢

宋史天文志天牢六星在北斗魁下貴人之牢也主繩愆禁暴  
甘氏云賤人之牢也

觀象玩占天牢六星其中無星則天下安有星則賢士傷星衆  
則貴人多下獄明大動搖則王侯有繫者天子有憂

按天牢六星其最南一星亦在黃道北三十度月五星皆不  
及犯

彗孛客星見天牢

宋史天文志客星彗星犯之三公下獄或將相憂  
觀象玩占彗孛出天牢諸侯相賊一曰大臣下獄 客星入天

牢斧鉞用諸侯有納土者海中占有德令郝萌曰赦有戮臣荆州占貴人有囚繫者出天牢王者賜諸侯地荆州占曰失土守天牢石氏曰大魚死人相食守二十日以上大赦荆州占曰鉞鉞用以初守日命國

天文會通孛孛客星犯守天牢大臣憂天下獄多寃

流星出入天牢

宋史天文志流星犯之有赦宥之令

雲氣出入天牢

觀象玩占黃白氣入天牢大赦黑氣入天牢三公將相受誅貴人親屬有憂白氣大圍長二三大出天牢中天下不安五穀貴



勢

貴人及親戚有斬者赤雲氣入天牢有反獄者一日獄中火起

宋史天文志勢四星在太陽守西北一日在璣星北勢厲刑人也主勛宣王命內常待官也以不明爲吉明則閹人擅權

按勢四星其最南一星亦在黃道北二十一度月五星皆不及犯

孛客星見勢

觀象玩占客星孛孛犯勢星中官受誅

天文會通孛孛在勢星內官受辱星孛勢星內侍竊主柄客星干犯勢星中官有憂客星守之中官有暴貴者一日內侍擅

權

流星出入勢

天文會通流星抵觸勢星中官惡之

雲氣出入勢

觀象玩占黃氣入四勢中官受賜赤氣出入中官反黑氣入中

官憂

天文會通赤黃氣入勢星中則中官受寵青白氣貫之貴人坐  
法紫氣下覆勢星則內官有叛謀

天理

史記天官書在斗魁中貴人之牢

宋史天文志天理四星在北斗魁中貴人之牢也星不欲明其  
中有星則貴人下獄

觀象玩占天理四星執法之官決獄之職巫咸曰天理水官也  
主司三公紀貴人明則法令峻急獄事煩多

按天理四星其最南一星亦在黃道北四十七度月五星皆  
不及犯

彗孛客星見天理

宋史天文志客星犯多獄 彗孛犯之國危

觀象玩占客星犯天理天下多獄廷亦坐之入天理法令不明

大臣有誅者

天文會通彗孛干犯天理大臣以家事下獄入曰大臣跋扈將相憂客星干犯天理廷尉有暴進者

流星出入天理

觀象玩占流星入天理貴人下獄一日人多繫獄者

天文會通流星出天理刑獄之官出使

雲氣出入天理

宋史天文志赤雲氣犯之兵大起將相行兵

天文會通黃白氣壓天理天下有冤獄蒼黑氣遮掩天理貴臣獄死

相

宋史天文志相一星在北斗第四星南總百司集衆事掌邦典以佐帝王一曰在中斗文昌之南在朝少師行太宰者明吉暗凶亡則相黜

觀象玩占相一星在北斗南天之丞相也主衣服文章其星明大則天子明忠臣用

天文會通相一星主冢宰位星小明而黃潤則宰相論道經邦天下和懌星大明而怒角則君臣不同道天下不理

按相一星在黃道北四十八度月五星皆不及犯

彗孛客星見相

觀象玩占彗孛犯相星輔臣憂客星出天相天子有變令

天文會通彗孛干犯相星貴相當之一曰臣下有陰謀 客星  
干犯相星踊相憂

### 流星出入相

觀象玩占流星犯天相三公將相有憂

天文會通流星出入相輔臣出使

### 雲氣出入相

觀象玩占黃白氣入天相將相有喜黑氣入將相憂死

### 太陽守

宋史天文志太陽守一星在相星西北斗第三星西南大將大  
臣之象主設武備以戒不虞一曰在下台北太尉官也在朝少

傳行大司馬者明吉路凶

觀象玩占太陽守一星明則人主威服四方天下治安不明則主令不行天下不治

天文會通太陽守一星明潤吉明大有怒角大將有叛謀

按太陽守一星在黃道北四十一度半月五<sup>星</sup>皆不及犯

彗孛客星見太陽守

宋史天文志客彗孛犯之爲易政將相憂兵亂

流星出入太陽守

觀象玩占流星抵太陽守兵起將出

天文會通流星入太陽守臣下被逐

雲氣出入太陽守

宋史天文志雲氣入黃為喜蒼白將死赤大臣憂

觀象玩占黃氣入之大臣受賜三公有喜蒼白氣入將軍戰死  
赤氣入宰相憂

天文會通黑氣入大將不利出師

內厨

宋史天文志內厨二星在紫微垣西南外主六宮之內飲食及  
后妃夫人與太子燕飲

按內厨二星其最南一星亦在黃道北六十一度弱月五星  
皆不及犯



彗孛客星見內厨

宋史天文志彗孛犯之飲食有毒

觀象玩占客星守內厨天下饑一日食官有變

流星出入內厨

宋史天文志流星犯之飲食有毒

觀象玩占流星入內厨有進飲食者色青黑有毒

天文會通流星干犯內厨糴貴民饑

雲氣出入內厨

觀象玩占黑氣入內厨飲食防毒

天文會通赤氣入內厨年凶黃氣入內厨天子燕樂飲食

天厨

宋史天文志天厨六星在扶筐北一日在東北維外主盛饌今光祿厨也星亡則饑不見爲凶

觀象玩占天厨六星主御膳星見則吉

天文會通天厨六星明則天下和平五穀熟星暗失色年穀不登

按天厨六星其最南一星亦在黃道北七十七度半月五星皆不及犯

彗孛客星見天厨

宋史天文志客星犯之爲饑

觀象玩占客星守天厨食官有變

天文會通彗孛干犯天厨耀貴

流星出入天厨

宋史天文志流星犯之爲饑

雲氣出入天厨

觀象玩占黑氣入天厨飲食中防有置毒者

天文會通黃氣入天厨天下豐熟白雲氣入之兵起爭食

天一

宋史天文志天一星在紫微宮門右星南天帝之神也主戰  
闕知吉凶明則陰陽和萬物盛人君吉亡則天下亂

觀象玩占天一一星光明潤澤則天子吉

按天一一星在黃道北六十五度半月五星皆不及犯

孛孛客星見天一

宋史天文志客星犯五穀貴孛孛犯之臣叛

觀象玩占孛孛犯天一石氏曰白衣會聚兵大起

天文會通孛孛干犯天一天子無出宮客星犯天一色赤大

旱色黑大水色白兵起色黃萬物各得其宜色青有喪

流星出入天一

宋史天文志流星犯兵起民流

觀象玩占流星抵天一海中占冬滯夏旱

雲氣出入天一

宋史天文志雲氣犯黃君巨和黑宰相點

天文會通赤氣入天一賢士危

太乙

宋史天文志太乙一星在天一南相近一度亦天帝神也主使  
十六神和風雨水旱兵革饑饉疫災害所在之國也明吉暗  
凶離位有水旱

按太乙一星在黃道北六十四度強月五星皆不及犯

彗孛客星見太乙

宋史天文志客星犯兵起民流火災水旱饑饉彗孛犯兵喪

觀象玩占。彗孛干犯太乙。水旱俱起。

天文會通。彗孛干犯太乙。大臣薨。不然則黜。客星守太乙。貴相薨。

流星出入太乙

宋史天文志。流星犯宰相史官黜。

雲氣出入太乙

宋史天文志。雲氣犯黃白。百官受賜。赤爲旱。兵蒼白。民多疫。觀象玩占。黑氣入出太乙。大水。

天槍

史記天官書。紫宮左三星爲天槍。

宋史天文志天槍三星在北斗杓東一曰天鉞天之武備也故在紫微宮左右所以禦難也明吉暗小兵敗芒角動兵起

觀象玩占天槍三星在北斗璣光之旁一曰天鉞天之武備以守衛紫宮金官也其星欬忽忽不明明大則斧鉞用伏兵行小而不明則兵敗移徙則君失御石氏曰天槍以備非常攻城襲邑當視槍星大而明不可出兵小而明則兵可出城可襲

按天槍三星其最南一星亦在黃道北五十九度弱月五星皆不及犯

彗孛客星見天槍

宋史天文志客星彗星犯皆爲兵饑

觀象玩占客星犯天槍斧鉞用入天槍荊州占曰有大戰出天槍石氏曰兵起大將出期一年

流星出入天槍

宋史天文志流星犯為兵饑

觀象玩占流星犯天槍邊防有憂

雲氣出入天槍

觀象玩占赤雲氣入天槍天子驚蒼白氣入兵起

天文會通黑氣入天槍衛士有匿謀

天棓

史記天官書右三軍曰天棓

按右承上文指紫宮而言



宋史天文志天棓五星在女牀北天子先驅也主分爭與刑罰  
藏兵亦所以禦難備非常也一星不具其國兵起明有憂細微  
吉

觀象玩占天棓五星在紫微垣外主禁暴防不虞又主爭訟其  
星微明而靜則天下戢兵明大動搖則兵起不明亦為兵起石  
氏曰明大則斧鉞用

按天棓五星其最南一星亦在黃道北六十九度強月五星  
皆不及犯

彗孛客星見天棓

宋史天文志客星入兵喪 彗星入兵起

觀象玩占。彗孛出天棓，兵大起，有亡國。客星出天棓，貴人有戮者。

天文會通。彗孛干犯天棓，禁衛為亂。客星守天棓，外奸入寇。流星出入天棓。

宋史天文志。流星犯諸侯多爭。

雲氣出入天棓。

宋史天文志。雲氣犯蒼白黑為凶。

觀象玩占。蒼白氣入天棓，國有喪，出之則禍除。一曰蒼白氣出天棓，則先驅有拜賜者。黑氣入，大人憂之。赤氣出天棓，兵大起。將軍戮死，入大人憂之。黃氣入，天子先驅有拜賜者，出之有除。

出者

元戈

宋史天文志天戈一星又名元戈在招搖北主北方芒角動搖則北兵起

觀象玩占元戈一星微而小明則天下安石氏曰色赤天下有兵

按元戈一星在黃道北五十四度半月五星皆不及犯

孛客星見元戈

宋史天文志客星守之北兵敗孛客星犯之占同

天文會通孛客星犯元戈干戈滿目國多盜客星犯元戈車騎

盈野

流星出入元戈

宋史天文志流星犯之北兵敗

雲氣出入元戈

宋史天文志雲氣犯黑爲兵退蒼白北人病

觀象玩占赤氣出兵起

太尊

宋史天文志太尊一星在中台北貴戚也不見爲憂

觀象玩占太尊一星亦名天尊守常則吉細微失色則貴戚有憂芒角動搖則貴戚恣橫星亡不見則貴戚有誅死者

按太尊一星在黃道北三十五度半月五星皆不及犯

孛孛客星見太尊

宋史天文志客孛犯之為貴戚將敗之徵

流星出入太尊

觀象玩占流星犯太尊貴戚有憂

雲氣出入太尊

觀象玩占黃白氣入太尊貴戚受賜青黑氣入貴戚有死者赤氣入貴戚有以罪受誅者